

四明叢書

張宗祥



尙書通考自序

書載二帝三王之政政者心與事之所形也是故道德
仁聖統于心制作名物達于事內外之道合而帝王之
政備矣然統乎心者先後古今脗合無二達于事者儀
章器物因革無存故求帝王之心易而考帝王之事難
矧後儒稽古不過以周爲據而秦人滅學周典亦多殘
缺迺欲以不完之文以徵隆古之舊斯益難矣然昔者
紫陽夫子之教必語學者以有業次如所謂堯舜典歷
象日月星辰律度量衡五禮六樂禹貢山川洪範九疇

之類須一一理會透盡讀書窮理卽器會通乃學者之
當務也余方授兒輩以書閒或有問不容立答則取關
涉考究者會萃抄撮或不可言曉者規畫爲圖以示之
至眾家之說有所不通則閒述臆見以附于下如舊圖
舊說已備者不復贅出其有未盡則隨條辨析焉歲月
積累寢成卷帙兒輩乃請次其顛末以便尋考名曰尙
書通考竊謂學有本末道無精粗禮樂官名聖人猶問
則讀是經者安得不求其故哉方將就正于博學君子
然後退授于家俾得格致之助亦庶乎紫陽朱子之教

云爾

梓材謹案四庫書目著錄尙書通考提要云其書徵引舊說以考四代之名物典章亦間附以論斷頗爲詳備又稱其以實用求書不以空言求書云

附錄

先生著尙書通考凡名物度數及七政九疇六宗五禮方州之貢賦水土律呂之長短忽微皆暢其說復系以圖彙集諸家而折衷以己意

梓材謹案先生序張仲純易象圖說云仲純學力高明與予知最久是先生固張提舉之講友也
補
隱君陳先生師凱

書蔡傳旁通自序

天道無心而成化聖人有心而無爲惟其有心也故無爲而無不爲惟其無爲而無不爲故動而世爲天下道行而世爲天下法言而世爲天下則此二帝三王之所以不能不有書也書既有矣凡一動一行一言雖千萬世而一日矣然書出于千萬世之前而書讀于千萬世之後則其一動一行一言又烏得而備知之此朱蔡師弟子之所以不能不有傳也傳既出矣後之讀書將不能究朱子之所傳不能領蔡氏之所授又不能如其行

輩之所講明則雖有傳猶未能備知也此鄱陽董氏之
所以有輯錄纂註也然其輯錄特問答之多端纂註又
專門之獨見初學于此苟本傳尙未曉晰而乃覽博則
茫無畔岸吾誰適從是董氏所纂乃通本傳以後之事
殆未可由此以通本傳也此旁通之所以贅出也嗟夫
書之有傳如堂之階如室之戶未有不由此而可以造
其地也然傳文之中片言之蹟隻字之隱呻其佔畢之
際囁嚅而齟齬者不爲無矣況有所爲天文地理律曆
禮樂兵刑龜策河圖洛書道德性命官職封建之屬未

可以一言盡也是以旁通之筆不厭瑣碎專務釋傳固不能效正義之具舉但值片言隻字之所當尋繹所當考訓者必旁搜而備錄之期至于通而後止俾初學之士對本傳于前置旁通乎側或有所未了者卽轉矚而取之左右庶幾微疑易釋大義易暢乘迎刃之勢求指掌之歸吾見其有融會貫通之期無囁嚅齟齬之患矣其言道德性命之際文理已明者略爲衍說或于名物度數之末無乃太簡者則詳究所出以致弗明弗措之意焉由是以了本傳次乃輯錄纂註則先入者定而中

不搖權度在我而外不惑近可以得諸儒之本旨遠可以會朱蔡之授受若夫二帝三王之所以爲天下道爲天下法爲天下則者則又存乎其人而已

梓材謹案四庫全書著錄書蔡傳旁通提要稱是編于名物度數蔡傳所稱引而未詳者一一博引繫稱析其端委其蔡傳歧誤之處則不復糾正如孔氏諸經正義主于發揮註文不主于攻駁註文也然不能以回護註文之故廢孔疏則亦不能以回護蔡傳之故廢其書矣

劉先生有定

劉有定字能靜莆田人少貧不慕榮進嘗著原範吟三十七章學者稱爲原範先生又著有衍極書五篇行世

俞先生元燮

俞元燮字邦亮其先建寧人徙長洲通蔡氏傳博采羣

說著集傳十卷或問二卷

張景春說

梓材謹案經義考又引黃虞稷之說言先生居于吳其卒也虞集銘之然攷道園學古錄未錄其文

隱君王葵初先生希旦

詳見介軒學案

鄒先生季友

鄒季友字晉昭鄱陽人著有尙書蔡傳音釋六卷書傳

會選多采用其書

黃氏千頃堂書目

朱先生祖義

朱祖義字子由廬陵人于諸經皆有句解今多散佚惟

尙書句解十三卷存 四庫全書總目

梓材謹案四庫著錄尙書句解提要云是書專爲啓迪幼學而設故多宗蔡義不復考證舊文然隨文詮釋詞意顯明使殷盤周誥詰屈聱牙之句皆可于展卷之下了然于心口其亦古者離經辨志之意歟

方先生傳

方傳著有書蔡氏傳考佚 經義考

梁先生寅 別見晦翁學案補遺

長史朱白雲先生右

詳見北山四先生學案

約圖刊本

謝氏續傳

牟先生楷

詳見北山四先生學案

竹坪家學

劉竹西先生庚達

劉庚達庚振弟號竹西先生傳其家學解開先其壻也

解春雨集

梓材謹案解先生開先嘗講易于竹坪亦云講于竹西滄浪蓋受劉氏一家之傳滄浪卽蒼簷也

竹坪門人

補同知王先生充耘

梓材謹案四庫書目錄先生所著四書經疑貫通八卷係吾鄞范氏天一閣藏本提要云其書以四書同異參互比校各設問答以明之蓋延祐科舉經義之外有經疑此與袁俊翁書皆程式之文也又言其閒辨別疑似頗有發明云

附錄

劉景文序先生書義主意曰四代之書蔡氏訓詁深得于朱子心傳之妙宜今日科舉之所尚也王君與耕以是經拾魏科愚嘗購求得其經義主意語雖不離于傳註之中而實有得乎傳註之外又可謂能發蔡氏之所

未言者歟

梓材謹案先生吉水人此序及黃氏千頃堂書目皆以其字爲與耕至讀書管見原序稱耕野王先生梅氏鶚云惜吾生之晚不得握衣于耕野之堂也是耕野其號爾四庫書目著錄讀書管見二卷提要云所說與蔡氏多異同其中如謂堯典乃舜典之緣起本爲一篇故曰虞書謂九族既睦既當訓盡謂象以典刑爲如象其罪而加之非垂象之意謂同爲逆河以海潮逆人而得名皆非故爲異說者至于洪範錯簡之說伊訓改正不改月之辨尙未能糾正所附周不改月惟魯史改月一條尤爲強詞大醇小疵別白觀之可也

雲濠謹案阮亭居易錄載擬兩漢詔詰二卷元進士王充耘與耕撰訓詞爾雅有漢人風是蓋先生未仕時所撰故題曰進士云

竹西門人

教諭解筠澗先生開

別見北山四先生學案補遺

王氏家學

王先生光薦

王先生吉

合傳

王光薦耕野先生從子也耕野易簣之際書其讀書管見卷端曰凡爲吾徒者須人錄一編以的本付吾兒其惓惓遺後之意如此耕野沒未幾而元綱板蕩山棚構壁世家藏書悉遭焚盪是編賴先生密置諸複壁中僅

免于燬乃以別本訂其訛缺以付耕野之子吉其可謂
善學耕野之學而不失其本者矣

讀書管見原序

王氏門人

張先生理

別見靜明寶峯學案補遺

竹西續傳

劉西山先生子彰

附從父鶴皋子桓

劉子彰竹西孫年十三而孤事母孝伯祖蒼簣先生及
叔父貢士鶴皋教之甚篤洪武間以賢良徵吉水令迎
之訓導于學著有四書要覽文集若干卷號西山先生

趙哲劉宗平其徒也子桓字迪哲嘗舉于鄉

解春雨集

附傳

進士梁先生臨

附師羅蒙正

梁臨字仲敬□□人少從羅蒙正遊講明尙書大義極
深研幾英華秀發爲時推重蒙正亟稱許之洪武四年
登進士

姓譜

西山門人

趙先生

趙哲字用哲吉水人好讀書寒暑忘倦從劉子章治書

經同門之士皆以爲不及洪武丙子申江西鄉舉會試

得乙榜官禁山教諭卒年二十二

解春雨集

檢討劉先生均

附見巽齋學案補遺

宋元學案補遺卷六十七